

Morning Regional Dogri News Bulletin, 19th July 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. सरकार संसद दे बरसांती आले इजलास दरान 6 नमें बिल पेश करोग।
2. घाटी च सुरक्षाबलें कब्जा रेखा कश दळं आतंकवादिं गी मारी-मकांदे होई घुसपैठ दी कोशश गी नाकाम बनाई दित्ता ऐ।
3. केन्द्र गृहमंत्री अमित शाह होरें आखेआ ऐ जे भारत इक ग्राम नशीले पद्धार्थ गी बी मुख्य च दाखल नेई होन देग।
4. न्यूजीलैंड च आयोजित तलवारबाजी आली राष्ट्रमंडल प्रतियोगिता च जम्मू कश्मीर दे तलवारबाज खडारिं बड़ा बधिया प्रदर्शन कीता ऐ।

<><><><><><>

Parliament Bills

केन्द्र सरकार अगले हफ्ते थमां शुरू होआरदे संसद दे मानसून सत्र च आपदा प्रबंधन अधिनियम च संशोधन सनें 6 नमें विधेयक पेश करोग। सरकार नै वित्त विधेयक दे इलावा नागरिक उड्डयन क्षेत्र च बपार गी सखल्ला बनाने दे मकसद कन्नै 1934 दे विमान अधिनियम गी बदलने आस्तै भारतीय वायुयान विधेयक 2024 गी बी सूचिबद्ध कीता ऐ। लोकसभा सचिवालय आस्सेआ कल संजा जारी संसद बुलेटन च विधेयकें दी सूचि प्रकाशत कीती गई ऐ। संसद दा मानसून सत्र 22 जुलाई थमां शुरू होग, जेहड़ा 12 अगस्त तगर चलोग। वित्त मंत्री निर्मला सीतारमण 23 जुलाई गी संसद च केन्द्रीय बजट पेश करगंन। इजलास दे दरान सूचीबद्ध होरने विधेयकें च बॉयलर बिल बी शामिल ऐ। तोआई लोकसभा स्पीकर ओम बिरला होरें सदन दे कम्मकाज मत्तल्लक सलाहकार कमेटी खडेरी ऐ जेहड़ी संसदी एजेंडा तैह करोग।

<><><><><><>

Infiltration

उत्तरी कश्मीर दे कुपवाड़ा जिले दे केरन सेक्टर च कब्जा रेखा पर सुरक्षाबलें घुसपैठ दी कोशश गी पूरी कामयाबी कन्नै नाकाम बनाई दित्ता ऐ। रक्षा सूत्रें मूजब सुरक्षाबलें दे अभियान च दऊं आतंकवादी मारे गे न। तोआई खीरी जानकारी थोने तगर इलाके च सुरक्षाबलें दा घुसपैठ रोधी अभियान बरोबर जारी हा।

<><><><><><>

Amit Shah

गृहमंत्री अमित शाह होरें राष्ट्री नारकोटिक्स हैलपलाइन “मानस-1933” दी शुरूआत कीती ऐ। इस हैल्पलाइन दे राएं लोक नशीले पदार्थें दी तस्करी दी जानकारी सांझी करी सकदे न ते नशामुक्ति ते आबादकारी बारे सलाह लैने आस्तै हर रोज 24 घैंटे नारकोटिक्स कंट्रोल ब्यूरो-एनसीबी कन्नै राबता करी सकदे न। गृहमंत्री होरें कल संजा नमीं दिल्ली च नारको-तालमेल केन्द्र दी 7मीं उच्च स्तरी बैठक दी प्रधानता कीती। इस मौके श्री शाह होरें आखेआ जे नशीले पदार्थें दे सेवन खलाफ लड़ाई बड़ी महत्वपूर्ण ऐ ते इसी पूरी संजीदगी कन्नै ते पैहल दी बिनाह पर लड़ेआ जाना लोड़चदा ऐ। उनें आखेआ जे एह इक चुनौती बी ऐ ते इक मौका बी ऐ ते इकजुटता ते पक्के निश्चे कन्नै एह लड़ाई जिती जाई सकदी ऐ। गृहमंत्री होरें आखेआ जे अजेंसिएं दा मकसद शड़ा नशीले पदार्थें दा सेवन करने आलें गी फगड़ना गै नेई सगुआं पूरे नेटवर्क गी तबाह करना होना लोड़चदा ऐ। उनें आखेआ जे भारत इक ग्राम नशीले पदार्थें गी बी मुलख च दाखल नेई होन देग।

<><><><><><>

J&K-LG

उपराज्यपाल मनोज सिन्हा होरें कल हारबाह दे पवित्र मौके पर दक्खनी कश्मीर दे अनंतनाग जिले च माता सिद्ध लक्ष्मी अस्थापन लोक भवन जाइयै मत्था टेकेआ। इस मौके पर उनें जम्मू कश्मीर दी खुशहाली ते रमानदारी दी प्रार्थिना कीती। उपराज्यपाल होरें आढ़ म्हीने दे शुक्ल पक्ख दी द्वादशी पर तीरथ राज सिद्ध लक्ष्मी पीट ट्रस्ट आस्सेआ आयोजित महा-जग च बी हिस्सा लैता। इस मौके बोलदे होई श्री सिन्हा होरें आखेआ जे समाज दे सब्बनेवर्गे दे लोकें गी लोड़चदा ऐ जे ओह प्राचीन धार्मिक थाहरें दे रक्ख-रखाव ते हिफाजत लेई प्रशासन दा सैहयोग करन। उनें प्रदेश दिएं पवित्र धार्मिक थाहरें पर श्रद्धालुएं लेइ उपलब्ध सुविधाएं च होर सुधार दी सरकार दी वचनबद्धता गी फही पक्का कीता।

<><><><><><>

Amarnath Yatra

जम्मू दे भगवती नगर आले आधार शिविर थमां 4 ज्हार 821 श्रद्धालुएं दा इक होर जत्था अज्ज बडलै श्री अमरनाथ जी दी यात्रा लेई घाटी लेई रवाना होआ। एह सारे श्रद्धालु 150 गड्डिं दे काफले च सुआर होइयै अगड़ी यात्रा लेई रवाना होए। इस जत्थे च 3 ज्हार 259 मर्द, 1 ज्हार 482 महिलां, 8 बच्चे, 63 साधु ते 9 साध्वियां शामिल न। कुल 4 ज्हार 821 श्रद्धालुएं चा 1 ज्हार 731 श्रद्धालुएं बडले थमां त्रै बजे बालटाल लेई ते 3 ज्हार 90 श्रद्धालु पहलगाम लेई रवाना होए, जित्थुआं ओह अपनी अगड़ी यात्रा लेई रवाना होंगन।

<><><><><><>

Ramban Health Programme(byte)

संपूर्णता अभियान तैहत बच्चे दे जन्म कोला पैहले दी दिक्खभाल सरबंधी कार्यक्रम च बड़ी बद्ध गिनतरी च गर्भवती महिलां हिस्सा लै'करदियां न। इस दिक्खभाल कार्यक्रम दा मकसद गर्भवती महिलाएं गी मुफ्त ते म्यारी दिक्खभाल सरबंधी सुविधा उपलब्ध करोआना ऐ। संपूर्णता अभियान दे आकांक्षी ब्लाक कार्यक्रम तैहत रामबन जिले दे खारी ब्लाक दे बक्ख-बक्ख वार्डें च प्रधानमंत्री सुरक्षत मातृव्य अभियान तैहत गर्भवती महिलाएं गी बक्ख-बक्ख फायदें बारे जागरूक बनाया जा'रदा ऐ। इस म्हीने इस जागरूकता कार्यक्रम च 50 गर्भवती महिला हिस्सा लै'करदियां न। इनें महिलाएं गी मुफ्त टीकाकरण बी कीता गोआ। एहदे इलावा गर्भवती महिलाएं गी बेल्ले सिर मुफ्त एम्बूलेंस दी सेवा बी उपलब्ध करोआइयां जा'रदियां न। साढे आकाशवाणी कन्नै गल्लबात करदे होई खारी दे जोनल मैडिकल अफसर डॉ. वसीम होरें आखेआ.....बाईट

<><><><><><>

Fencers

जम्मू कश्मीर दे तलवारबाजें न्यूजीलैंड च होई दी तलवारबाजी सरबंधी राष्ट्रीय मंडल प्रतियोगिता च 1 चांदी दा तगमा ते त्रै कैहू दे तगमें जित्तियै भारत दा मान बघाया ऐ। इक अधिकारिक जानकारी मूजब हरशित कोहली ते छवि शर्मा नै जेकेएससी दे खेलो इंडिया राज्य केन्द्र च सिखलाई लैती ऐ। श्रिया गुप्ता नै गुजरात दे उत्कृष्टता सरबंधी राष्ट्रीय केन्द्र च सिखलाई हासल कीती। सुफियान वहीद नै पटियाला च सिखलाई हासल कीती।

<><><><><><>

Soft Skill Reasi

जिला प्रशासन रियासी आस्सेआ आई.आई.टी जम्मू दे सैहयोग कन्नै जिले दे नोजवानें लेई “अवसर” योजना तैह्त सिखलाई कार्यक्रम दा सरिस्ता कीता गेआ जेहदा मकसद नोजवानें गी लोडचदे हुनरें कन्नै लैस करना ऐ तां जे उंदी उद्यमिता सरबंधी समर्थ च बाद्धा कीता जाई सकै। म्हीने भरै तोड़ी चलने आले इस कार्यक्रम दा आयोजन डी.सी. दफतर दे ऑडिटोरियम हाल च कीता जा’रदा ऐ। एह पैहलकदमी खित्ते दे नोजवानें गी सशक्त बनाने ते उंदे हुनर च बाद्धा करने लेई जिला प्रशासन रियासी ते आई.आई.टी जम्मू दे धेइयै गी दर्शादा ऐ। इस सिखलाई कार्यक्रम दे दायरे हेठ सैलसफा, राई-बाई, मार्किटिंग, ब्लागिंग ते दूरसंचार जनेह् विशें गी आंदा जाग। रियासी दे जिला विकास कमीशनर विशेष महाजन होरें सब्बनें ख्वाहिशमंद नोजवानें गी साद्धा दित्ता ऐ जे ओह इस मौके दा फायदा ठोआन ते इस सिखलाई कार्यक्रमें च हिस्सा लैन।

<><><><><><>

SC-NEET

सर्वोच्च अदालतै कल राष्ट्री परीक्षा अजेंसी एनटीए गी निर्देश दित्ता ऐ जे ओह नीट अंडर ग्रेजुएट 2024 दे सब्बनें विद्यार्थिं दे नतीजे औंदे शनिवार दपैहरी 12 बजे तगर अपनी इवैबसाईट पर प्रकाशित करै। भारत दे प्रधान न्यायधीश जस्टिस डी.वाई.चन्द्रचूड ते जस्टिस जे.बी.पारदीवाला ते जस्टिस मनोज मिश्रा हुंदी खंडपीठ नै मेदवारें दे नां सार्वजनिक नेई करदे होई शैहर ते केन्द्र स्थाबै नतीजे प्रकाशित करने दा हुक्म रसाल कीता। सर्वोच्च अदालतै दी पीठ मैडिकल दाखला मतेयान कन्नै जुड़ी दी तकरीबन 40 याचिकाएं दी सुनवाई करै करदी ही। अगली सुनवाई संगारें होग। एहूदे शा पैहले इस मामले च पीठ नै आखेआ हा जे एहूदे च कोई शक-शूबा नेई ऐ जे मतेयान दी पवित्रता कन्ने समझौता कीता गेआ ऐ।

<><><><><><>

Bike Rally

जम्मू दे सैलसफा निदेशालय ते शक्ति उदघोष फाउंडेशन नै रलियै 18 थमां 27 जुलाई 2024 तगर 9एं दिनें दा सब्बने महिला आस्तै मोटर सैकल आगियानद । आयोजन कीता। एह यात्रा जम्मू थमां श्रीनगर शैहरा राएं होंदे होई सियाचिन बेस कैंप तगर चलोग। इस मोटर सैकल अभियान दा विशे ऐ “राईड विद प्राईड” साढ़े बहादुरें गी सम्मानत करना। इस अभियान गी कल जम्मू दे बलिदान स्तंभ थमां सैलसफा मैहकमे दियां जायंट डरैक्टर सुनेना शर्मा मेहता होरें झंडी दस्सियै रवाना कीता। सुनेना शर्मा होर इस मौके पर मुख् परौहनियां हियां। इस मौके पर बोलदे होई मेहता होरें इस सफर पर निकलने आली महिलाएं गी बढ़ावा दित्ता ते बहादुरें गी सम्मानत करने ते महिलाएं दे सशक्तिकरण दी पैरवी करने दे मकसद कन्नै कीते गेदे इस गैह दा हिस्सा बनने लेई महिलाएं दा आभार जताया। उनें अग्गे आखेआ ऐ जे उनें बाइकरें गी सब्बै बवसी आली सहूलतां उपलब्ध करोआने लोडचदे इंतजाम कीते दे न।



Fastag NHAI

जरनैली शिडकें सरबंधी भारतीय प्राचीकरण एनएचएआई आस्सेआ गडिडएं च अग्गे आले शीशे पर फास्टटैग नेई लाने आले थमां दो गुणा टोल वसूल करोग। प्राचीकरण नै आखेआ ऐ जे जानी-बुज्झियै विंडस्क्रीन पर फास्टटैग नेई लाने करी टोल प्लाजा पर बे-मतलब चिर लगदा ऐ जिस करियै लोकें गी असुविधा होंदी ऐ। प्राचीकरण नै इस सरबंधै च सारी सरबंधी अजेंसिएं गी व्यापक मानक संचालन प्रक्रिया जारी करियै ऐसी गडिडएं थमां दो गुणा शुल्क वसूलने लेई आखेआ ऐ। मुख्य भरै च फौले दे तकरीबन 45 ज्हार किलोमीटर लम्मी जरनैली शिडकै ते एक्सप्रेस-वे आस्तै तकरीबन इक ज्हार टोल प्लाजा पर शुल्क वसूल कीता जंदा ऐ। मुख्य भरै च लगभग 8 करोड़ राष्ट्रीय जरनैली शिडकें दा इस्तेमाल करदे न।

